



D. O. M.  
THESES ANATOMICÆ  
ET  
CHIRURGICÆ.



QSSA, solidiores corporis humani partes, cæteris omnibus aliis sustinendis stabiliendisque inserviunt. Intimiorum illorum compagem perlustranti, fibras mirificè inter se implexas & ordinatas, multiplicia vasa diversis plenâ liquoribus, eandemque demùm structuram ac molliores corporis partes undique exhibent. Non mirum igitur, utrumque partium genus, iisdem præcisè morbis affici, tumoribus scilicet, nec-non continui ac contigui solutionibus.

Hæc inter, haud infrequentior *Luxatio*, quæ est *Recessus extrinseci ossis mobilis ex cavo in quo naturaliter movebatur*. Quicumque morbi illius curationi cupit incumbere, non solum commissuras ossium, sed etiam in iis ligamenta, cartilagine, humorem synoviale, musculos, valaque iis vicina perspecta habere debet; de iis ergo, antequam ulterius progrediamur, pauca in antecessum præmittere juvat.



Ossium commissura, non eorum solum consensum, sed & eorum adhesionem præsupponit. Consensus ossium, *Articulatio*, adhesio, *Symphyfis* dicitur. Multiplex articulatio: vel enim ossa moventur, vel non; primo in casu *Diarthrosis*, in secundo verò *Synarthrosis* vocatur. Tertiæ articulationis speciem quidam admittunt (a) in quâ, ossa eadem ac in *Synarthrosi* ratione juncta, quemdam tamen motum possunt exercere; hanc idèd *Amphiarthrosim* nominant.

DUPLEX *Diarthrosis*, manifesta nempe & obscura. *Diarthrosis* manifestæ species sunt, 1°. Orbicularis, quæ rursus *Enarthrosim* & *Arthrodiam* continet. 2°. Alterna, quam *Gynglimum* quoque appellant. *Gynglimus* angularis est vel lateralis: angularis in perfectum & imperfectum dividi potest. 3°. Planiformis, ab obscurâ *Diarthrosi* nullatenus distinguenda.

AD *Synarthrosim*, alteram articulationis speciem, 1°. utraque futura, legitima, nempe & nothâ, 2°. Harmonia; 3°. *Gomphosis*, quartoque tandem *χρῆσθαι* (b) possunt referri.

OSSA, vel solâ partium suarum dispositione, vel substantiâ quâdam mediante inter sese connectuntur; hinc duplex *Symphyfis*, prima *Symphyfis* absque medio, altera *Symphyfis* cum medio, *Synevrosisque*, *Synchondrosisque*, aut *Syssarcosis* pro variâ substantiæ mediantis indole nuncupatur.

CARTILAGO substantia est flexilis, albicans, elastica, extus levigata, intus compacta, absque cavis, fibrisque, saltem conspicuis. Cartilagine duplicis generis humano in corpore passim reperiuntur; ad articulos illæ pertinent, aliæ vero secus; priores triplicis rursus sunt generis; mobilium ossium extremitates his operiuntur; cavitates articulorum illis augentur; aliisque tandem in hisce cavitatibus contentis quidam diriguntur motus.

LIGAMENTUM substantia est fibrosa, compacta, difficile extensilis, elastica, &c. Ligamenta ad articulos pertinent, vel non: priora interna aut externa sunt; hæc rursus articulum omnino comprehendunt, & capsularia dicuntur, vel juncturis ossium obfirmant, quibusdamque motibus dirigendis inserviunt.

ARTICULATIONUM cava, sinoviâ, humore viscoso & limpi-

(a) Vid. Winslow Expos. Anat. n°. 146.

(b) Consul. Instit. Chirurg. Platneri, n°. 1093.

do, continuò lubricantur; eam à glandulis quibusdam, sinovialibus ergò dictis, ibique reperiendis separari compertum est. Medullarem succum huic juxtà, quorundam placita immisceri non posse, nobis videtur. (a)

PLURIMUM inter se discrepant luxationes. Earum differentie deducendæ sunt, 1°. ab articulo qui morbo illo afficitur, 2°. à loco quem caput ossis occupat, 3°. à causà à quâ pender luxatio, 4°. ab ejus symptomatibus, 5°. tandem ab ejus tempore. Dividuntur autem in completas & incompletas; superiores, inferiores & laterales; simplices, compositas & complicatas, recentiores & veteres, &c.

CAUSÆ luxationum internæ sunt vel externæ: externas inter, ea omnia annumerantur quæ ligamenta ultra modum elongare, ossaque suis à cavis ejicere possunt: tales sunt, ictus, lapsus, nissus, &c. internæ verò ea sunt quibus ossa inæqualibus trahuntur viribus, musculi ligamenta-ve, articulum ambientia relaxantur, articularum cava extraneo quodam corpore replentur, mutius-ve partium destruitur consensus: haud infrequentiores sunt, ligamentorum debilitas à prægresso serosorum humorum in articulum influxu; convulsiones; paralisis; sinoviæ accumulatio; articularum abscessus; ossiumque tandem intumescencia.

DIAGNOSTICA luxationum signa, in communia & propria dividuntur: communia quolibet in luxatione occurrunt, scilicet, dolor, immobilitas, tumor eo in loco quem caput ossis occupat, & cavitas in eo equo excidit, partisque tandem accurtatio vel elongatio.

PROPRIA varia sunt pro variis luxationum speciebus. Completam à causà externâ productam sequentia indicant. 1°. Externæ causæ actione subito accidit; 2°. alia luxati ossis extremitas versus oppositam partem dejicitur, ex quo judicari simul potest, an superior, inferior, lateralis-ve sit; 3°. membrum unam in partem facilius movetur; 4°. partis affectæ musculi inæqualiter tenduntur.

INCOMPLETAM è contra luxationem esse his signis cognoscitur: 1°. Figura nec longitudo partis immutantur; articulus tamen

(a) Præterquam quod non demonstratur, quâ ratione medullaris succus in articularum cava extillet; liquoris illius cum sinoviâ, miscela inpossibilis est, uti expertum fuisse se dicit Daverneyus, Tract. de morb. Oss. Tom. 2, pag. 359.

4

paulò eminentior est ac in statu naturali, 2°. non faciliùs in unam, quàm in aliam partem movetur; 3°. dolor intensissimus est.

LUXATIONIS à ligamentorum relaxatione diagnosi deducitur, ex eo quod, 1°. prægressus fuerit serosorum humorum in partem decubitus; 2°. hæc facillimè quâquâ versum moveatur; 3°. adfuit in articulo tumor cum mollietie.

Si è contrà ab humoris sinovialis congestione pendeat, sit perdetentim & absque dolore, 2°. membrum elongatur, 3°. difficile, sæpiùsque nullatenùs reponi potest. 4°. dum tentatur reductio, sonus quidam percipitur, ei similis quem subacta refert argilla.

LUXATIONEM à paralyfi pendere nullus inficias ire potest, cum membrum paralyticum afficit; 2°. cum cavum adest inter caput ossis & solitam illius sedem; tertioque tandem cum os luxatum omnem in partem titubat.

Quæ tandem à convulsionibus, abscessu, aut ab ossium intumescentiâ pendet, facillimè cognoscuntur.

Ut varia luxationum diagnosi est pro diversis earumdem speciebus, sic quoque varia prognosis. Ex. g. quæ *Diarthroses* orbiculares afficiunt, aut ab externâ causâ pendet, simplices & compositæ, recentes, &c. iis quæ in *Diarthrosis* alternis accidunt, aut ab internâ producuntur causâ, complicatis &c. faciliùs & reponuntur & curantur.

Huius-ce morbi symptomata omnia, à ligamentorum tendinunque nimia extensione, cartilaginum inversione, glandularumve sinovialium contusione pendet, & eorum præcipua sunt dolor, immobilitas, inflammatio, febris, convulsiones, marcor, torpor, anchilosis, &c.

TRIA ad illius curationem requiruntur; 1°. enim luxata ossa redaptari debent; 2°. suo loco retineri; 3°. præsentia curari accidentia, futuraque averti.

LUXATORUM ossium repositio extensione, contra-extensione, reductioneque tandem obtinetur. Extensionis ac contra-extensionis nomine, illæ designantur actiones, quibus dimotorum ossium extrema à se invicem deducuntur.

MANIBUS, habenis, machinisque fieri possunt, his cum cautelis  
ut, 1°. pars eo sit in situ, ut muscoli æqualiter extendantur; 2°. loca quibus laquei debent imponi spleniis defendantur; 3°. laquei ipsismet affectis partibus & pone condylos applicentur; 4°. laxius aut strictius pro majori minori-ve ægri obesitate constringantur; 5°. vires quibus trahuntur æquales sint; 6°. ossum dimotio-  
ni, vique musculorum proportionales; 7°. tandem gradatim agant.

REDUCTIO quæ est actio, quâ os luxatum suam in sedem reponitur, non est celebranda, quin sufficiant extensiones; id autem cognoscitur ex eo quodd partes sufficienter à se invicem removeantur, musculique modò tumefacti, depressi appareant.

REDUCTIO vero ita fieri debet, ut os idem repetat iter, ac dum fuit luxatum, 2°. lentè ac successivè suam in cavitatem reponatur. Eam ritè factam esse indicant, 1°. sonus quidam eo quo fit temporis momento percipiendus; 2°. verò accidentium, doloris putà ac immobilitatis imminutio.

QUAMQUAM luxatorum ossum redaptationem primò insituen-  
dam esse dicamus, ab eâ tamen abstinendum, 1°. cum luxatio inflammatione, convulsionibus, fracturâ-ve in eodem osse complicatur, nisi forte, vasa majora, dimotis ossibus comprimentur, gangrenæque periculum immineat; inflammatio enim priùs dis-  
cuti, convulsionem sedari, fracturæque tandem debet consolidari; 2°. cum luxatio vetustior est; tunc enim ut plurimum, impossi-  
bilis evadit.

LUXATA ossa suo in loco retinentur, 1°. absolutâ quiete; 2°. fasciatione; 3°. situ idoneo. Deligatio diversimode, pro variis, luxationibus, instituitur, eaque in luxationibus à causâ internâ magis quàm in iis quas externa produxit causa, necessaria est.

Variis quoque situs, hic corpus integrum; luxatum articulum ille spectat: exceptis maxillâ inferioris, extremitatumque superiorum luxationibus, æger in aliâ quâvis luxatione supinus recumbere debet. Membrum affectum, eo sit in situ, ut, 1°. musculi, quantum fieri potest, relaxentur; 2°. molliter firmiterque sustineatur; 3°. cæteris partibus elatus.

Futura luxationum incommoda, illarum reductione, reper-  
cutiatum applicatione, venæ sectionibus plus minus-ve repe-

6  
nitis, diætâ, potu diluente & refrigerante, quiete primis à luxatione temporibus, levibusque tandem motibus primis diebus elapsis, arcentur: præsentia verò, mediis modò enumeratis, anodynisque, emollientibus, narcoticis, aut tandem resolventibus, pro re natâ, adhibitis curantur.

DE Luxationibus à causâ externâ hîc tantùm modò egimus. Quæ vero ab internis causis, sinovialis scilicet humoris accumulatione, convulsionibus, &c. pendent, non sunt reducendæ, quin morbi quibus producuntur, propriis sibi remediis fuerint destructi.

*Has Theses, DEO JUVANTE, Præsîdeque M. RAPHAËLE-BENEVENTO SABATIER, Liberalium Artium & Chirurgiæ Magistro, tueri conabitur ANDREAS-JOANNES LAGRAVE, Parisinus, in almâ Universitate Parisensi Liberalium Artium Magister.*

P A R I S I I S,

IN REGIIS CHIRURGORUM SCHOLIS,

*Die Sabbati 29<sup>a</sup>. Decembris à sēsqui-secundâ post meridiem ad Septimam. Anno Domini 1753.*

PRO ACTU PUBLICO

ET

MAGISTERII LAUREÆ

---

Typis DELAGUETTE, Regii Chirurg. Collegii  
Typographi. 1753.